

# Službene novine Federacije BiH, broj 46/15

Na osnovu člana 19. stav 2. a u vezi sa članom 17. stav 1. Zakona o agencijama i unutrašnjim službama za zaštitu ljudi i imovine ("Službene novine Federacije BiH", br. 78/08 i 67/13), federalni ministar unutrašnjih poslova donosi

## PRAVILNIK

### O OBЛИКУ И САДРŽАЈУ CERTIFIKATA ZA OBAVLJANJE POSLOVA ZAŠТИТЕ LJUDI I IMOVINE ZA LICA KOJA POLOŽE ISPIT ZA OBAVLJANJE TIH POSLOVA

#### Član 1. (Predmet Pravilnika)

Ovim pravilnikom uređuju se oblik i sadržaj certifikata za obavljanje poslova fizičke zaštite, tehničke zaštite i poslova odgovornog lica (u dalnjem tekstu: certifikati) koji se izdaju u skladu s odredbama čl. 17. do 19. Zakona o agencijama i unutrašnjim službama za zaštitu ljudi i imovine ("Službene novine Federacije BiH", br. 78/08 i 67/13 - u dalnjem tekstu: Zakon).

#### Član 2. (Svrha certifikata)

Certifikati koji se izdaju u skladu s ovim pravilnikom su javne isprave koje služe za dokazivanje da je određeno lice stručno sposobljeno za obavljanje poslova fizičke zaštite (certifikat za fizičku zaštitu), tehničke zaštite (certifikat za tehničku zaštitu) i poslove odgovornog lica (certifikat za odgovorno lice).

#### Član 3. (Uvjeti za sticanje certifikata)

Pravo na sticanje certifikata u skladu s ovim pravilnikom imaju lica koja završe odgovarajuću obuku za obavljanje poslova zaštite ljudi i imovine i polože ispit iz te obuke na način kako je to određeno u čl. 17. i 18. Zakona i člana 6. ovog pravilnika.

#### Član 4. (Obaveze agencije za zaštitu ljudi i imovine i pravnih lica koja imaju organizovanu vlastitu unutrašnju službu zaštite)

Agencije za zaštitu ljudi i imovine (u dalnjem tekstu: agencija) i pravna lica koja imaju organizovanu vlastitu unutrašnju zaštitarsku službu (u dalnjem tekstu: služba zaštite) mogu na poslovima fizičke zaštite, tehničke zaštite i poslovima odgovornog lica angažovati samo lica koja imaju odgovarajući certifikat koji je izdat u obliku i sadržaju utvrđenim ovim pravilnikom, osim ako je drugačije određeno zakonom i drugim propisima.

**Član 5.**  
**(Oblik i sadržaj certifikata)**

(1) Certifikat za obavljanje poslova zaštite ljudi i imovine izdaje se:

- a) za obavljanje poslova fizičke zaštite,
- b) za obavljanje poslova tehničke zaštite,
- c) za obavljanje poslova odgovornog lica.

(2) Certifikat iz stava (1) ovog člana štampa se na tvrdom papiru u obliku formata A 4, oivičen linijom zlatnožute boje, koja je širine 1 mm i od krajnjih ivica papira udaljena 3 cm.

(3) Sadržaji certifikata iz stava (1) ovog člana utvrđeni su u obrascima br. 1., 2. i 3., koji se nalaze u prilogu ovog pravilnika i čine njegov sastavni dio.

**Član 6.**  
**(Polaganje ispita za obavljanje poslova zaštite ljudi i imovine)**

(1) Izdavanje certifikata iz člana 5. ovog pravilnika vrši se nakon što kandidat položi ispit predviđen u članu 17. stav 1. Zakona prema planu i programu kojim se utvrđuju sadržaj, način i uvjeti polaganja ispita i druga pitanja potrebna za polaganje ispita, a donosi ga Policijska akademija Federalnog ministarstva unutrašnjih poslova - Federalnog ministarstva unutarnjih poslova (u dalnjem tekstu: Federalno ministarstvo).

(2) Kandidatu koji položi ispit prema stavu (1) ovog člana Federalno ministarstvo u roku od 15 dana nakon položenog ispita izdaje odgovarajući certifikat iz člana 5. ovog pravilnika.

(3) Ispit iz stava (1) ovog člana polaže se pred Komisijom koju imenuje federalni ministar u skladu sa članom 17. stav (6) Zakona.

**Član 7.**  
**(Troškovi polaganja ispita i izdavanje certifikata)**

(1) Troškove polaganja ispita i izdavanja certifikata za obavljanje poslova zaštite ljudi i imovine snosi polaznik obuke.

(2) Visinu troškova polaganja ispita i izdavanja certifikata za obavljanje poslova zaštite ljudi i imovine rješenjem utvrđuje federalni ministar unutrašnjih poslova.

**Član 8.**  
**(Izdavanje certifikata za lica koja su dobila potvrdu za položeni ispit za odgovorno lice po ranijim propisima)**

(1) Lica koja su dobila potvrdu za položen ispit za odgovorno lice, koja je izdata po ranijim propisima, mogu podnijeti zahtjev za dobijanje certifikata za odgovorno lice u skladu s ovim

pravilnikom.

(2) Troškovi izdavanja certifikata za lica iz stav (1) ovog člana bit će u visini troškova koji se utvrđuju prema članu 7. ovog pravilnika.

#### **Član 9.**

##### **(Izdavanje potvrde o oduzimanju certifikata)**

(1) Za lica kojima je u skladu sa članom 58. Zakona oduzet certifikat iz člana 5. ovog pravilnika izdaje se potvrda.

(2) Potvrdu iz stava (1) ovog člana izdaje Policijska akademija na osnovu evidencije iz člana 10. ovog pravilnika.

#### **Član 10.**

##### **(Evidencija o licima kojima je izdat ili oduzet certifikat za obavljanje poslova zaštite ljudi i imovine)**

U skladu sa članom 48. stav 1. tačka 3) Zakona, Federalno ministarstvo vodi evidenciju o licima kojima je izdat ili oduzet certifikat za obavljanje poslova fizičke i tehničke zaštite, odnosno odgovornog lica, što se vrši prema Pravilniku o sadržaju, obrascu i načinu vođenja knjiga evidencije u oblasti zaštite ljudi i imovine koje vodi Federalno ministarstvo unutrašnjih poslova - Federalno ministarstvo unutarnjih poslova ("Službene novine Federacije BiH", broj 92/14).

#### **Član 11.**

##### **(Nadzor nad provođenjem ovog pravilnika)**

Nadzor nad provođenjem ovog pravilnika vrši Federalno ministarstvo.

#### **Član 12.**

##### **(Način izdavanja certifikata koji nije izdat do stupanja na snagu ovog pravilnika)**

Za lica koja su stekla pravo na certifikat utvrđen Zakonom, i koji nije izdat do dana stupanja na snagu ovog pravilnika, taj certifikat izdat će se prema odredbama ovog pravilnika.

#### **Član 13.**

##### **(Prestanak važenja Pravilnika)**

Danom stupanja na snagu ovog pravilnika prestaje da važi Pravilnik o obliku i sadržaju certifikata za obavljanje poslova zaštite ljudi i imovine ("Službene novine Federacije BiH", broj 55/09).

#### **Član 14.**

##### **(Stupanje na snagu pravilnika)**

Ovaj pravilnik stupa na snagu osmog dana od dana objavljivanja u "Službenim novinama Federacije BiH".

Broj 01-03-02-1-75  
8. juna 2015. godine  
Sarajevo

Ministar  
**Aljoša Čampara**, s. r.